

Date – 22/01/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Mizoram sawrkarin thla thar February ni 2 atangin kuthnathawktute tan a thlai thar lei leh hralh a kalpui tan dawn.
2. Mizoram Agricultural Marketing Board chuan Mizoram loneitute sawhthing lei tura rawn ngaihven company engemaw zat an awm tawh tih an sawi.
3. US President Donald Trump-a chuan India leh US ten sumdawnna lama inremna an siam thuai a ring a ti
4. India leh European Union ramte chuan venhimna leh ralthuam lama thawhdunna ti chak turin hma an la.

<><><>

MAMB

Mizoram sawrkarin thla thar February ni 2 atangin kuthnathawktute tan a thlai thar lei leh hralh a kalpui tan dawn.

He thu hi vawiina Mizoram Agricultural Marketing Board (MAMB) in Aizawl Press Club a thuthar thehdarhtute an kawmnaah an sawi a, MAMB co-chairman, adviser to CM (Handholding) ni bawk Dr KC Lalmalsawmzauva chuan sorkarin kuthnathawktute thar chhuah thlai thar chi 5 - Sawhthing, Aieng hring, Hmarchate ro, Hmunphiah ro leh Mizo buh hum te a lei sak dawn a ti a, Sawhthing ah minimum rate chu kg 1 cheng 50 zel a ni a, support price chu kumin February ni 2 atanga May ni 30 thleng an pe dawn a ni. Aieng hring minimum rate chu kg 1 ah cheng 20 a ni a, hmarchate ro minimum rate chu kg 1 ah cheng 350 a ni a, Aieng hring leh hmarchate ro support price chu February ni 2 atanga April thla thleng pek a ni dawn a, Hmunphiah ro minimum rate chu kg 1 ah cheng 80 niin support price chu February ni 2 atanga March thla thleng a pe dawn a, Mizo buh hum minimum rate chu kg ah cheng 30 niin, nikum November thla atanga kumin January thla kal mek thleng an lei sak bawk tih a sawi a ni.

Byte: Dr KC Lalmalsawmzauva

MAMB hotute chuan Hmunphiah chu ZOHANCO-in an buaipui dawn a, a ro tha grade thliar loin cheng 80-in sawrkarin collection centre a siam:- Sakawrdai, Saitual, Marpara South, Marpara North, West Phaileng, Bilkhawthlir, Saipum, Mamit, Tlabung/Tiperagath, Lungen, Thenzawl, Vairengte leh Lungleiah te a lei khawm dawn a. Hmunphiah leina man hi Society Bank Account kaltlanga inpek vek tur a ni a, Society kal tlang lovin mimal ta lei a nih dawn loh avangin, Hmunphiah chingtu zawng zawngte chu mahni awmna khua Society a inziaklut vek turin an ngen a, mithenkhat Hmunphiah grade tha mahnia hralha, a grade hniam sawrkara

hralh tum pawl an awm thu leh state thenawm Manipur atanga lalut a Mizorama thar chhuah anga hralh tum an awm tih an hriat thu sawiin, man chhuah an nih chuan an chungah hmalak a ni dawn an ti a, heng mite venpui turin khawtlang hruaitute an sawm a ni.

Byte: MAMB officials on hmunphiah

Kuminah chuan Aieng chu a hring chauh lei a ni tawh dawn a, MAMB hotute chuan Aieng chu a hmel mawihnai leh tha te thlang chhuak turin a thar chhuaktute an ngen a, sorkar chuan a lei turin firm/society pasarih a ruat a, Rozik Herbal chuan Aieng hnah ro quintal 1 chu cheng 100 in a lei dawn bawk a ni. Mizo buh hum chu nikum November thla atanga tun thla kal mekah hian lei a ni a, kg nuai 1, sing 6, sang 8, 839 lei tawh niin lei mek zel a ni a, nikuma an kalpui dan aia a danglamna chu Mamit leh Kolasib district-ah te chauh ni tawh lovin, Mizoram pum atangin a duh chuan Kolasib Pangbal kawnah an hralh thei a ni.

Hetihlai hian Mizo hmarchate ro chu hralh chhuah a nuam hle tih an sawi a, nikumah pawh sorkar puihna tel lovin an lo hralh tawh a, kuminah pawh sorkar inrawlh ngai lo, Support price pek ngai lo tura beisei a nih thu an sawi a, Mizoram hmarchate (bird eye chilli) chu Mizoramin a neitu nihna GI tag a nei tawh avangin chin uar deuh deuh tha an tih thu an sawi bawk a ni.

<><><>

MULCO MOU

Mizoram Milk Producers Cooperation Union Limited (MULCO) leh National Dairy Development Board (NDDB) te chuan Mizorama bawnghnute tharchhuah leh sawngbawlina lam tihhmasawna tur thawhhona thuthlung MOU vawiin khan an ziak.

Chief Minister Pu Lalduhoma leh Cooperation Minister Pu PC Vanlalruata te hmaah inremna hi an ziak a, Chief Minister chuan thu tawi sawiin, he inremna hian bawnghnute tharchhuah kawngah a tanpui dawn ringawt lova, ran vulhtu mi tam takte eizawna leh sum leh pai thawhchhuah a tipung dawn a ni a ti. Tunlai thiamna leh khawl tha zawkte nena intuaitharin, bawngvulhtute theihnate hlawk zawkin hman chhuah a ni dawn a ni, a ti. Inremna chu chak taka kalpui a nih theih nan Project Monitoring Unit din a that tur thu a tarlang bawk.

Thawhhona tura inremna hi Mizoram sorkar aiawhin Cooperation Secy Pu Udit Rai Prakash an a ziak a, National Dairy Development Board aiawhin Pu S. Rajeev, Executive Director, NDDB in a ziak a, Mizoram Milk Producers Cooperation Union Limited (MULCO) aiawhin Pi Lalhmunliani, Managing Director chuan a ziak a ni.

National Dairy Development Board hian Ministry of Cooperation Flagship Scheme White Revolution 2.0 dung zuiin Mizoram state tan Comprehensive Dairy Development Plan a siam ang a, chumi ti hlawhtling tura Mizoram Milk Producers Cooperation Union Ltd te hmalakna tur a duang ang a, technical lam leh thil tul tinrengah NDDB hian a thawhpui dawn a ni.

Bureau of Animal Husbandry & Statistics 2024-25 tarlan danin kum 2024-25 chhungin India hmarchhakah Mizoram hian nitin bawnghnute a tharchhuak tlem ber a, a tharchhuah zat chu 64.4 Thousands KG per Day (TKgPD) a ni.

<><><>

MAMB

Mizoram Agricultural Marketing Board (MAMB) chuan Mizoram loneitute sawhthing lei tura rawn ngaihven company engemaw zat an awm tawh tih an sawi.

He thu hi vawiina MAMB-in Aizawl Press Club a thuthar thehdarhtute an kawmnaah an sawi a, MAMB hotute sawi danin nikum ang lo takin kuminah sawhthing lei hun tura ruat a thlen hmain sawhthing lei tura rawn ngaihven company engemaw zat an awm a; Gulf ram atanga rawn lei tur company pakhat chu MoU ziahpui tawh niin, anni hian retail-a hralh tur quintal 2000 leh sawngbawl tur quintal 10000 lei turin MAMB nen inremna an ziaak tawh a ni. Hetihruah hian sawhthing man (rate) ala chet ve reng avangin a man san hun deuh nghah mek a ni a, kar liamta khan chawhrualin kg ah cheng 54 vel a ni a, hei vang hian MAMB chuan company dangte chu sawhthing man ala chet reng avangin MoU a la ziahpui duh rih lova, Gulf company pawh hi a rate la fillup leh turin MoU ziahpui an ni a, Sawrkar chu loneitute leh a leitu sumdawngte suihzawmtu (facilitator) chauh an nih thu an sawi bawk a ni.

MAMB chuan kuminah chuan Buffer Stock an siam tawh dawn lo tih sawiin, Mizoram pumah Secondary Collection Centre (SCC) 64 awm tura ruahman a ni a, sawhthing te chu SCC atanga hralh vek tawh tur a ni an ti a, cheng 50 aia sanga hralh ngei tum turin an ngen a, a tlin lohna a awm erawh chuan support price a hnawh khah a nih tur thu sawiin, Sawrkarin support Price a pek dawn tho avanga man tlawm te a hralh an remti lo tih sawiin, SCC tina a hralh theihna hniam ber chu an bituk fel tawh a, zawm vek turin an chah a ni. Sawhthing chu Mizoram chhunga thar , Society member ta chiah lak tur a ni tih sawiin, Sawhthing man tlawma lei khawm, sawrkar Support Price beiseia khawi SCC emaw a hralh tum an awm tih an hriat thu sawiin, hetiang ang man chhuah an awm chuan an chungah a tul ang zela action lak a nih tur thu sawiin, khaw tina khawtlang hruaitu chu venpui turin an sawm a ni.

Byte: MAMB officials on Sawhthing

MAMB hruaitute chuan Mizorama Sawhthing tharchhuah chi hnih-Thingpui leh Thinglaidum te chu khawvel hriatah a neitu nihna, GI tag an nei tawh tih sawiin, Mizo sawhthing chu a lian lo nain a quality tha ber chi a ni a, chemical leh pesticides nena chin a nih meuh loh avangin miin an duh bik a, chu chu zawrh thiam a tul hle an ti a, a hrisel bik, a thak tha bika, a tui a tam bik tih sawi uar hle turin an chah a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

US PRESIDENT

US President Donald Trump-a chuan India leh US ten sumdawnna lama inremna an siam thuai a ring a ti. World Economic Forum, Davos-a neih mekah he thu hi sawiin President Trump-a chuan Prime Minister Narendra Modia chu fakin a thian hnai tak anih thu a sawi bawk a ni. Washington leh New Delhi te hian sumdawnna kawngah inremna siam tumin inbiakna an kalpui mek a. Hemi chungchang zawhna hi chhangin President Trump-a chuan inremna tha tak an siam dawn tih a sawi a ni.

<><><>

PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmuhkhawm hlawhtling takin a nei. He programme hi PM Modian kum 2015 a bul a tan atangin sawrkar inrelbawl na leh hnathawh dana inthlak danglamna tam tak a thleng a. Sawrkar hnathawhte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawnna ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkar thutlukna pawimawh tak takah nasa takin a pui a, hmasawnna hna thawh tikhawtlai thinte chin fel niin sawrkar hnathawhte rintlak leh zuala siam an ni. PRAGATI hnuaia hlawhtling project zingah hain Ahmedabad Rail Project Phase I hi Gujarat-a khawpui inkalpawhna ti changtlung tura hmalakna lian tak pawh hi telh a ni a. Union Housing and Urban Affairs Ministry hnuaiah he project hi thawh niin km 40.03 a thui tur a ni a. Cheng vaibelchhe 12,945 senga tih puitlin tura tih a ni a. Kum 2018 April ni 25 khan a vawi khat nan PRAGATI hnuaiah hnathawh dan thlirho a nia . Hetianga PRAGATI hnuaia vil chhoh anih atang hian chak takin hna tawh a ni a. Kum 2022 September ni 30 khan Prime Minister Narendra Modia chuan mipuite hman theih turin a hawng a.Kum 2022 October thlaah a taka hman tan a ni ta a ni.

<><><>

INDIA-EU

India leh European Union ramte chuan venhimna leh ralthuam lama thawhdunna ti chak turin hma an la. Karleht hian New Delhi-ah EU-India Summit neih a ni dawn a. Hetah hian Security and Defence Partnership chungchang hi tihfel beisei a ni a. EU Foreign Policy lama hotupa Kaja Kallas chuan nizana European Parliament inkhawm Strasbourg-a neihah he thu hi a puang a. An inremna siam tur hi a zau in a tha dawn hle a ti a. Maritime security, Counter-terrorism, cyber defence leh tuipei lama venhimna lam Chiang Zawka Zirchianna turte a nih thua sawi.

<><><>